

安陽縣金石錄

安陽縣金石錄卷第七

偃師武虛谷先生著

安陽縣知縣鐵嶺貴 泰校梓

施換塔石額記

存正書紹聖元年九月立在丈八佛塔上

夫佛之浩聖罔極至威咸仰宇宙之間四維之中六合之內  
曷有莫不欽於聖者佛宣法暨出無邊無界羣氓持心演誦  
靡不濟拔於彼岸法教肇興建自周朝于是混沌之前我佛  
儀像已立在清虛廓落之外既產乾坤必安杳冥有形之內  
當時未可以化像於人間後來漸誘於寰海之中微迤邐透  
攝於萬類之上是以風化曠遠曩劫罔收人人志敬有果有

報家家常慕獲福獲勝緣流以顯上達於刀利之聖宮既除  
惡際下徹於阿毗之苦處是時高明善因無不敬崇者也如  
顯我丈八尊佛既從衡廬而踊出之時天有不奇之祥地有  
無涯之瑞想當時視日而轉轉晶輝觀月而別加清朗海水  
澄波山青秀麗一切有情之物無不瞻仰者是以四方黎庶  
之家見佛所出便乃齊心助聖遽立塔殿之基欲以歸安之  
處須建有福之地乃可遷佛如就平坦之中千人而莫能分  
毫搖動若陟山頭一土而用力軋軋速進如迄山巔修成寶  
塔立在相州之境疆居林縣口後年深日遠風摧雨塌乃塔  
門額累累有口今欲別安門額卻是相州西五十里安陽縣  
西龍山村人也口王隴西只於紹聖歲朱明之月因憶我佛

詰於聖谷□心就禮如禮罷所仰聖因□塔依然未有所驟  
乃□門額綻壞當時便發願心欲換此門額日夜无寐速命  
高人去選其石且見西山岌岌及更□□遠望烟蘿遍諸嶠  
略如風□□無有不到似崑崙嶠峴樣豈有不歷忽然門到  
□谷觀昊天涯瑞□万端是時只就此其匠人同謀一□□  
而作竊且爲塔額耳願安石以後家榮日長福氣時增養蚕  
而作厚重重種稼而從累顆顆六畜雙孳門清永吉願子孫  
世世昌昌轉願皇王常登寶殿百僚卿相郡邑官員日添高  
品更願九族榮顯普天下人民咸受快樂矣今以狂序其言  
難可竭言前意所謂无智論幽深奧義之理不能搜源其趣  
願風雨順時不盡□宣者記矣

大宋紹聖元年甲戌歲季秋乙亥朔二十六甲子日換額  
相州安陽縣西龍山村獨施換塔額石李用

選石兼鐫字匠人許婆村衛弁婿史安

丹青處士象村郭政同施工食交口村衆人

相州安陽縣西段村習進士郭漸撰并書

案碑末署習進士郭漸蓋宋時士人以本科應舉卽以所  
業書名類如此者頗見諸石刻偃師金石遺文補錄宋修  
湯王廟記結銜鄉貢三禮張宗立與此並相符矣又丹青  
處士象村郭政據鄴乘載宋志章武管統村有象村足徵  
古邑名所流傳有自備方志之攷也

有隋相州天禧鎮寶山靈泉寺傳法高僧靈裕法師傳并序

存正書紹聖元年十二月立在天禧鎮

釋靈裕法師姓趙氏定州曲陽人也在幼童時每見沙門佛像必拜禮聞屠宰聲必加悲愴年七歲卽欲捐俗父母不許遂傳覽羣書及十五丁父憂苦出哀瘠杖而後起事親篤孝編之史冊服畢遂往趙郡應覺寺出家後聞慧光律師在鄴都卽往從之會光已歿乃投道憑法師授十地論及華嚴涅槃等經皆晨夜研究博尋舊解闡發新異衆翕然稱之時齊方興釋典有法上者爲僧大統學者望風嚮附惟裕專精獨立不偶倫類後法止頗欽服之裕常與諸僧共談儒教旁設講席聽者同集兩得所聞覆述句義無一遺者自是擅名鄴下遠近師附俗呼爲裕菩薩多從之受戒焉裕持性剛潔器

識堅明志存遠大不局偏授每有傳講必恭恪勤厚延請乃  
赴既臨講席聽者莫不肅然自持一夕布薩說戒靜影惠遠  
法師造涅槃經疏詳練檢覆緣此傳裕師勵聲曰惠遠讀疏  
言是法師因緣衆僧說戒豈是魔說遠聞而憚之自爾因不  
越進稟於戒範女人尼衆莫敢面祭其嚴毅如此嘗與鄴下  
諸法師連坐開講齊安東王婁戲拜諸僧次禮至裕前不覺  
怖畏流汗退詢厥由知其戒行精苦遂奉爲戒師造寶山寺  
以居之裕通達三乘辯對乘機前後所講科目無常時同學  
者或譏之裕曰此乃大士之宏規也豈拘拘於常情哉後周  
滅齊廢毀釋教裕乃衣斬纓冠布經與同侶二十餘人潛遁  
村落鬻繭儒書夜理佛經時歲饑穀貴裕乃造卜書一卷占

糴米二升而已負米者相繼裕歎曰先民有言舐蜜勿傷  
驗於今矣乃取卜書對衆焚之更以所得供饋同厄及隋興  
復釋教始去纓經改襲舊儀真緋正紫五大色服正背之衣  
凡乘律則並不入室常服邠支纔過其肘人或謂之法師若  
此將非邀譽耶師對曰君子求名小人求利亦何爽乎謂者  
赧然心服開皇三年相州刺史樊叔畧創立講會延集名僧  
有詔令立僧官叔畧乃舉裕爲都統裕語叔畧曰都統之德  
裕德非其德都統之用裕用非其用既德用非器事理難從  
叔畧不聽裕迺潛游燕趙久之還居相州大慈寺開皇十一  
年文帝詔裕入長安令住興善寺延入宮掖與皇后獨孤氏  
歸敬之禮求受菩薩戒師曰至尊是萬基之主靈裕乃凡庸

比邱詎敢爲師也遂辭不已方始從受未幾詔爲國統裕因

辭請歸於鄴文帝許之乃命左僕射高頻右僕射蘇威納言

虞慶則總管賀若弼等請寺宜旨代帝復受戒懺罪并送綾

錦衣服絹三百段助營寶山寺御自注額改號靈泉蓋取八

山之泉師之上字合以爲稱聖意欲存師名之不朽耳旣還

相州更住演空寺

今濟明寺是也

及仁壽中分布舍利諸州起塔多

有變瑞時人咸以爲吉祥裕聞歎曰此相禍福兼表夫白花

白樹白塔白雪豈非凶兆耶未幾果應獻后安養之徵衆始

傳裕言爲信相州刺史薛胄所居堂礎變爲玉胄喜設齋慶

之裕曰此乃瑠璃耳誠之慎之宜禳禍祈福胄不從後楊諒

作逆胃竟坐累流之邊裔裕之明識皆此類也裕以大業元

年終於演空寺道俗相與殯於寶山靈泉寺側裕所有經律  
及詩頌雜集百餘卷行於當世嘗製寺十誥以法御徒  
釋氏宗而奉之其他可知也有弟子日光寺法礪慈潤  
詩惠休定國寺道昂并曇榮等皆以明律習禪一時宗匠各  
有別傳以載德業云元祐八稔秋九月天禧仕人牛彥景命  
余就弟敷演旬有一日乘暇領徒遊目寶山攀蘿捫石越壑  
登峯瞻巖隈靈龕尋林泉勝概考其名實雅符史傳至於元  
林塔像道憑石堂魏齊隆替之基周隋廢興之跡遺緒脩存  
勸之琬口獨師盛德徽猷穎拔衆表墻仞法力功莫大焉而  
杳無支提良用慨然乃募信士郭文真率衆於寺之東南隅  
岑麓之上建塔設像俾好古觀風之士瞻仰有歸矣皆紹聖

晉

元年十二月八日釋德殊叙并題額 習唯識論小童師慶

相州衛弁洞天浩宗儀刊 修塔匠人張宣

案石刻後列釋德殊叙并題額習唯識論小童師慶書傳  
載靈裕嘗與鄴下諸法師連坐開講齊安東王婁叡拜諸  
僧叡北齊書有傳叡字佛仁皇建初封東安王此傳作安  
東與齊書異傳載相州刺史薛冑所居堂礎變爲玉冑喜  
設齋慶之裕曰此乃琉璃耳誠之慎之宜禳禍祈福冑不  
從後楊逆作逆冑竟坐累流之邊齋隋書薛冑傳漢王諒  
作亂并州云朝廷以冑懷一心鎖詣大理竟坐除名配防  
嶺南道病卒蓋冑所爲詭譎觀望自貽罪戾碑乃歸於靈

裕先識亦其徒黨炫耀言之不足爲依

案碑稱靈裕還相州更住演空寺今淨明寺也是釋德殊  
當紹聖時所毀擊之寺据安陽集甲寅燈夕會淨明寺卽  
其地詩有聊趣淨律莊嚴地一看通衢自在燈寺蓋建於  
城內臨通衢不遠

### 施石峽龍頭物件記

存正書崇寧二年在水冶孝親寺

相州安陽縣大同鄉新安管水冶村孝親崇福院住持賜紫  
沙門□□手下正班鍾源□□□□爲有師叔僧景普□□  
□□□□□□化不□安合社化緣人建立具施主如後  
石潤村鄭懷男鄭存施石硤一隻

倪村任亮施龍頭一箇

南平村口人趙口口油口錢伍貫

黃口村口口哥施錢壹貫

水冶村李彥口化緣立年人口

崇寧癸未歲庚辰朔甲辰日安立記

諸多施主同共結緣

石匠衛弁安

案記分兩層上層刻記文云相州安陽縣大同鄉新安管水冶村攷太平寰宇記安陽舊有二十七鄉今三鄉然三鄉之名畧焉不載余檢安陽集周君墓誌有塋感化鄉之文今又於此記得大同鄉是宋之三鄉已見其二矣新安

管水冶村是宋制以鄉統管以管統村猶得改其遺也下  
層載石澗村倪村南平村黃口村並與宋志合

李智平建碑亭記

存行書大觀元年四月在元林禪師碑側

安陽縣南平村信士李智平游寺觀禪師碑建立已來歷年  
綿遠風日曝裂鰲座湮沒謹拾淨財命工出拔復新構亭葺  
護以永其久伏冀存亡父母得悟无生眷屬安康同登覺道  
見聞隨喜發菩提心法界衆生獲安樂果宋大觀元年四月  
望日住持寶山靈泉寺僧福澄記南平村王氏男李智平弟  
惇冲齊悅從洞天郅宗儀刊

案李智平修亭蓋護寺僧福澄爲記始末如是與堯城令

王進思碑龜趺已毀土人猶爲建置皆知古物淪棄之可惜蓋亦好奇喜事流也予故著之以表淳風

韓跂一姪六殤子墓記

存行書大觀三年十一月在治西水治孝親寺

余弟朝散大夫紹之第三子曰俊胃字顯夫少穎悟力學有自立之志不幸染疾年十七卒於潁州官舍紹聖三年十一月二十四日也余之第四子謝和尚第五子賀老第六子金老第七子頑叟及余弟僊房二子皆在襁褓不育今以儀公大葬舉一姪六殤於新安祖塋之東同瘞焉大觀三年十一月二十日朝散大夫知通利軍事管勾學事兼管內勸農事上騎都尉韓跂記

案韓跂記稱余弟朝散大夫紹之弟三子曰俊胄字顯夫  
外有殤兒謝和尚賀老金老頑叟跂之子也又有僖孺爲  
其弟之二子錄此以補韓氏譜所缺記稱儀公大塋東都  
事畧忠彥本傳進左僕射兼門下侍郎封儀國公是也後  
題朝散大夫知通利軍事管勾學事兼管內勸農事上騎  
都尉韓跂記跂見北岳題名云安陽韓跂元豐六年仲冬  
知成德軍藁城縣得替已嘗恭謁祠下今復自祁之鼓城  
解官再遂瞻拜連治二邑皆獲善罷云跂之歷官合此結  
銜可以畧舉矣古人重其骨肉之感殤兒天歿於外無不  
歸塋先塋近時有託爲偷生之說誑惑愚夫凡小兒女不  
幸短折遽棄溝渠或以敝席束草捲縛虛瘞路側行道悽

感而彼昏不知安得以韓君誌殤兒之文語之使其疚心也乎

王宣造石香鑪記

存正書政和四年季春在天禧鎮永慶寺

天宋相州安陽縣感化鄉靈泉管光巖村天禧鎮王宣今發誠心率衆造石香鑪一座施永慶禪院伏願

皇帝萬歲 重臣千秋

同施人李氏男呂明王真王喜王仲馬父馬密陳用馬信耿  
賽馬万李儀李善侯進呂氏男王儀朝秀張文張口景善侯  
存呂德口口口書

施佛維口頭李氏

始建永慶禪院住持講經沙門惠安

政和四年甲午歲季春上旬三日建

匠人呂昌郎善造并刻

案記前題感化鄉靈泉管光巖村天禧鎮據安陽集故太常博士周君墓誌銘墓於相州安陽縣感化鄉祖塋之次卽此所題鄉名也今得之足以證明周君之墓實在今縣西南域矣又稱靈泉管光巖村鄴乘引宋志靈泉管有光巖南今無此名殆此題光巖村也鄴乘巖作巖又多南字蓋駁文

尊勝陀羅尼經幢記

存正書宣和三年二月立在城西關北

口口相州文殊寺彌勒院管勾賜紫尼文惠口口祖先二師  
記祖師俗姓陳法諱懿能遷口口自六歲出家至十八歲遇  
同天節口經得度爲尼授具足戒師能保身寡慾少疾享壽  
七十三歲崇寧八年正月初十日化于本院文惠營塋於郡  
城西開元寺庚戌度弟子五人長日文惠次曰元悟元進元  
慶元通逮宣和三年歲次辛丑二月初八日文惠再具石建  
幢安塋聊紀歲月以待於永遠謹記

案石幢諸面皆書經文惟二面有小記尼文惠述其具石  
建幢之由所云祖師俗姓陳法諱懿能至十八歲遇同天  
節口經得度爲尼神宗以四月十日爲同天節宋制遇慶  
誕度僧尼類如此也宋朝事實宣和元年春正月乙卯詔

改尼爲女德士寺爲宮院爲觀此記在宣和三年寺稱文殊寺彌勒院管勾賜紫尼豈徽宗之詔暫行而隨停罷故足仍復其舊與記又云藝於郡城西開元寺庚域今開元寺基在西關西北是宋時相州之城與今並同而此幢置於開元寺之東殆後人移其故處與孝廉董化南訪得之榮事堂記

存正書在魏公廟龕置壁間宣和四年五月立

宣和元年秋七月相州守臣韓治以疾求去詔以其子衛尉少卿肖胃爲直秘閣件代其任上曰韓氏世官於相先帝詔也若父子今口爲守口口事矣缺聖訓之口又以鼎臣使記

其所以惟三朝安社稷功成身退再爲相守熙寧八年薨缺

神宗皇帝命其口子正彥口之又詔有司聽其官子若孫一  
 入世世為相吏口口邱缺今上皇帝口祖口父繼志念功所  
 以褒表忠獻之口缺守相純彥去郡命王之長孫治繼之令  
 省皆缺侯以世而不以賢故論者譏焉缺止區區王謝轉側  
 一偶僅有遺後缺國家於韓氏不封建而貴不割土而缺業  
 之餘前者濟其美後者受其缺宋無極可也龜口奄有殆不  
 足缺者前有畫錦之記後有醉白之文口口臣缺少監楊紫  
 金魚袋趙鼎臣記

通直郎提點河北口口公事缺

中大夫提點河北東路刑獄公事缺

宣和四年五月二十日立石

案記文下截漫滅今紀其要者云宣和元年秋七月相州  
守臣韓治以疾求去詔以其子衛尉少卿肖胄爲直秘閣  
往代其任東都事畧韓忠彥傳子治徽宗時爲太僕少卿  
出知相州以疾丐祠命其子肖胄代之與記州合惟官大  
僕與記稱衛尉少異至傳畧書徽宗時以記文証爲元年  
秋七月蓋足以補史闕文以記言魏公熙寧八年薨缺神  
宗皇帝命其子正彥口之安陽集故壽安縣君王氏墓  
誌銘稱予第四姪尚書比部員外郎正彥卽其人也又言  
純彥去郡命王之長孫治繼之令肖胄口史載子孫爲  
吏於相可徵如是後題少監賜紫金魚袋趙鼎臣記書體  
最雄秀惜不見書者名

韓悅道墓誌蓋

存篆書無年月舊藏縣署今移置魏公祠

案誌石蓋篆文凡九字題曰宋昌黎韓悅道墓誌銘字徑三寸餘渾勁有古法據王巖叟撰魏公家傳韓氏之先出自晉卿獻子之後以國爲氏子孫散居諸郡在昌黎者最爲著姓公卽昌黎之裔也据是則韓氏著籍在安陽皆以昌黎表其郡望是悅道爲公之支屬無疑矣惟志文爲人掩沒不可知其概畧今以附於魏公之祠俾守者善護之

醉白堂記

佚

故魏國忠獻韓公作堂於私第之池上名之曰醉白取樂天

池上之詩以爲醉白堂之歌意若有羨於樂天而不及者天下之士聞而疑之以爲公既以無愧於伊周矣而猶有羨於樂天何哉軾聞而咲曰公豈獨有羨於樂天而已乎方且願爲尋常無聞之人而不可得者天之生是人也將使任天下之重則寒者求衣饑者求食凡不獲者求得苟有以與之將不勝其求是以終身處乎憂患之域而行利害之途豈其所欲哉夫忠獻公既以相三帝安天下矣浩然將歸老於家而天下共挽而留之莫釋也當是時其有羨於樂天無足怪者然以樂天之平昔而求之公較其所得之厚薄淺深孰有孰無則後世之論有不可欺者矣文致太平武定亂畧謀安宗廟而不自以爲功急賢才輕爵祿而士不知其恩殺伐果敢

而六軍安之四夷八蠻想聞其風采而天下以其身爲安危此公之所有而樂天之所無也乞身於疆建之時退居十有五年日與其朋友賦詩飲酒盡山水園池之樂府有餘帛廩有餘粟而家有聲伎之奉此樂天之所有而公之所無也忠言嘉謀效於當時而文采表於後世死生窮達不易其操而道德高於古人此公與樂天之所同也公既不以其所有自多亦不以其所無自少將推其同者而自託焉方其寓形於一醉也齊得喪亡禍福混貴賤等賢愚同乎萬物而與造物者游非獨自比於樂天而已古之君子其處已也厚其取名也廣是以實浮於名而世誦其美不厭以孔子之聖而自比於老彭自同於邱明自以爲不如顏淵後之君子實則不至

而皆有侈心焉臧武仲自以爲聖白圭自以爲禹司馬長卿自以爲相如揚雄自以爲孟軻崔浩自以爲子房然世終莫之許也由此觀之忠獻公之賢於人也遠矣昔公嘗告其子忠彥將求文於軾以爲記而未集公薨既葬忠彥以告軾以爲義不得辭也乃泣而書之

案宋刻醉白堂記久毀沒今檢明人重刻者有二一在韓魏公祠此卽在縣學明倫堂左龕置牆壁者也後列山人秀水尤嘉謹書其立石當萬歷二年甲戌二月

魏公生祠碑

佚

河朔訪古記公熙寧初力辭上宰再典鄉邦未平歲河北

地震水災命公安撫四郡移鎮太名相人思之卽公畫錦坊故口築生祠以祠公廟昔有宋中書舍人王覲所撰碑兵毀不存

魏公祠堂記

佚

河朔訪古記彰德城中府學之西亦有公祠堂宋鄂州嘉魚令邱邱爲撰廟記其碑今置府學儀門下

宋故常君墓誌銘并序

存正書無年月在豐樂鎮

趙郡張□□□

盜匪常



泉之深土之口君之口宜有後

口安任口刊

案墓誌爲土人作碁石捶磨幾盡惟誌題宋故常君字存  
又云淦陽常故知君之里居姓氏如此淦陽宋時屬磁州  
與安陽接壤此誌得移置豐樂鎮公館則石之出土在漳  
水之南矣墓當近於是惜不可尋頃得漢碑曰得此誌常  
君其有厚幸與

郎山亭碑

佚

河朔訪古記飛仙臺基在府治敏功堂後今構觀音堂其  
上臺北十餘步踰小巷後園有休逸臺基面山亭基金節

度完顏熙載作養素廬其上今廢其碑尙存

案今俗呼老府街觀音閣當爲納新所見敏功堂後觀音  
堂遺址明人因而修之

高僧靈裕漢師塔銘

存正書無年月在天禧鎮

正像季運道襲宏隆徇物篤志播厥真風七財富贍五備回  
通虛來實往派演不窮行爲世範德以內充天子宗事博約  
成功幻翳星隕廓徹太空於戲異世不與師同

相州十方開元寺住持傳戒賜紫惠洵 監寺賜紫淨展

靈泉寺主福進福嚴惠安立石 師慶書

案銘稱法師爲天子宗事以靈裕碑徵之居相州大慈寺

開皇十一年文帝詔裕入長安令住興善寺延入宮掖與  
皇后獨孤氏歸敬之禮求受菩薩戒卽指其事塔銘石不  
甚大中鐫銘爲大字效顏平原不失遺矩立石年月與靈  
裕傳碑刻當同時

金

寶山寺地界記

存正書大定九年三月在寶山寺

大魏武定四年

勅賜寶山寺常住白藥石山等地土東至石門西至林慮縣  
界分水嶺南至西善應村河北至水峪口河道

大齊天保元年

勅賜本寺白藥石山壹座四至依前

大隋開皇五年

勅賜寶山靈泉寺白藥石山等地十四至依前遠寺林木並  
是本寺祖師墳塋之地

大金天會五年本寺僧定沖法智等把寺投拜並不曾離業  
地內青苗壹頃捌拾貳畝大定四年十二月內給到戶帖  
天禧鎮東菜園地并陸地計壹拾畝東至元十七郎西至  
道南至道北至元十七郎

先師於地內撥地叁畝與師姪

惠安充修院地寺南白藥石山一帶斜縮巒岫不等計地  
壹頃東至石羊峪西至木口嶺南至山脚北至采園峪口

山

又次西沙石地壹段計壹拾叁畝伍分東西各至隔南至  
澗北至山又長峪坡沙石地壹段計地伍畝貳分東西各  
至山南北各至道并其余遠寺地土又貳拾叁段計壹頃  
柒拾貳畝靈柒毫

又承管王琪白石地四十畝八畝熟土納秋粟二斗物力  
錢十文

寶海立文字與寶山每年出稅錢二貫

大金大定九年歲次己丑三月十五日本寺住持比丘  
法智立石

素地界石刻自魏齊隋金元四代並有賜田內載白蓮石

山及石門水峪石羊峪木口嶺茶園峪口山諸名蓋亦古墟邑之可見者錄之以備方志之徵

元林禪師碑左側題字

案題字兩溜漸蝕損不可見惟一行正書題大金國甲午歲大定十四年十月十五日文可讀旁有正書徽大上人各俱難諦審獨有游此及咸平年字

重修樂尙書廟記

佚

劉賡撰樂尙書廟碑記傳之故老墓上舊有公廟因洪水泛溢金皇統間遂移於此見大定二十五年鄉貢進士山邦直重修廟記

彰德府安陽縣乞伏村重修唐帝廟記

存正書明昌六年六月建在乞伏村

前應奉翰林文字同知制誥趙秉文撰并書題額

夫道足以爲萬世法而澤足以爲萬世祀是將有以脩制法  
關百聖參天地之化育後天地而不亡者矣故桀紂爲獨夫  
而仲尼得通祀景公有千駟而夷齊到今稱之德之在人焉  
可誣也況乎有聖人之德都天子之位首出百王之上而教  
傳百世之下者哉傳曰惟天爲大惟陶唐則之今天日月星  
辰之昭回雷風雨露之振蕩寒暑陰陽之變化春生而秋殺  
明來而晦謝以終始萬物者豈非天之化也哉今夫君臣父  
子之歸仁義道德之寶金木水火土穀之用壯者力於作而

老者休於廬生者養而死者葬以衣被天下後世者豈非陶  
唐氏之遺化也哉陶唐氏之化在於斯民日用之間而莫能  
名其所以然非天也耶然則去之千百世如將見之廟而宇  
之尸而祝之以鼓舞斯民者亦天也是非所謂不亡者耶嘗  
謂帝之德當世思之可也後世何自而思之賢者知之可也  
野人何自而知之舊邦饗之可也佐邑何自而饗之譬之說  
食必噉說穢必唾此亦人之情也有人於此暴其人之孤識  
與不識必環視而怒匍匐而往救之親與不親必相顧而嘆  
親非在已而喜怒爲用凡所以爲彼者爲我而已且夫帝既  
外其身以先人亦所以爲天下後世是故教莫正於叙彝倫  
降二女以刑家則志在和萬邦矣口莫公於傳神器捨其子

以禪舜則志在爲蒼生矣德莫大於振大災治水以命禹則志在利萬世矣功施於彼而利及於此恩加於當時而廟食於後世生而不以黃屋爲心沒而享崇軒之貴生而不以彩椽爲飾沒而都華構之安康衢古謠也後世里歌社舞簫鼓嘈雜有遺音者矣土銅土簋昔所御也後世山肴野蔌瓊薌苾芬有遺味者矣易曰威感也夫威而至於有心則不足以有感矣相之西六十里而遺有聚落曰乞伏帝之祠在焉西挹太行北枕漳水古木森然上閱漢晉居人張伯厚等易其棖棟之朽折者而新之治其垣壁之毀缺者而復之廟成謁文於僕竊惟相古邑也君殷三甲之居相文王之居姜里皆有祠廟載在祀典獨唐帝之祠藝者無所出意其神不相於

茲土也顧嘗以爲帝之神如雨露之在天水泉之在地何所  
往而不在獨惠彼而遺此豈理也哉嗚呼以如神之智變化  
往來其有方乎以如天之仁徧覆包函其有殊乎以歷象授  
時之政安知不佐歲功以成物乎以博施濟衆之心安知不  
訓明天子以惠茲澤獨乎生而厚其恩沒猶被其賜展敬乞  
靈焉可已也敢爲之銘銘曰

鬼神睢盱伏羲受圖人文權輿堯倫既叙五教旣敷唐文煥  
乎披昏挾塗藥民之愚有典有謨位非我娛萬民其孥丹朱  
其疎陸水其都人蟲其居吁嗟都俞恩漸于膚今其已夫祀  
焉忽諸遺祠路隅田婦耕夫或祝或巫白馬彤車清風肅如  
神來有無清漳之墟歲孰一區神游魏孤明昌有道千載同

苻堅壤康衢走不知乎金之世陶唐氏之民歟

明昌六年六月望建

中州金石記安陽縣乞伏邕重修唐帝廟記明昌六年六月立趙秉文撰並正書題額碑云相之西六十里而遠有聚落曰乞伏帝之祠在焉西挹太行北枕漳水古木森然上閱漢晉又云相古邑也若殷三甲之居相文王之居姜里皆有祠廟載在祠典獨唐帝之祠義若無所出予按太平寰宇記云永定縣本漢內黃縣地隋開皇十八年改爲堯城縣因堯所居之城爲名唐末改爲永定縣又云丹朱墓在縣東一里堯之子也攷永定廢縣在今府城東西十里宋省入安陽縣則其地祠堯實當以此丹朱墓亦在府

東南畿邨趙秉文不能遠考故以爲義無所出耳南宋金  
元以來文人多而學人少徃徃如此獨怪金史稱秉文自  
幼至老未嘗一日廢書之說也

案碑身題彰德府安陽縣乞伏村重修唐帝廟記金史地  
理志彰德軍節度明昌三年陞爲府以軍爲名記在六年  
稱府與史相符又題銜前應奉翰林文宇同知制誥趙秉  
文撰并書題額本傳載秉文明昌六年入爲應奉翰林文  
宇同知制誥亦與碑符文內引傳曰惟天爲大惟陶唐則  
之易堯爲陶唐蓋以堯爲名臨文避之惟稱論語爲傳尙  
書序正義凡書非經則謂之傳言及傳論語孝經正謂論  
語孝經是傳也漢武帝謂東方朔云傳曰時然後言人不

厭其言又漢東平王劉雲與其太師策書云傳曰陳力就  
列不能者止又成帝賜翟方進策書云傳曰高而不危所  
以長守貴也是漢世通謂論語孝經爲傳也以論語孝經  
非先王之書是孔子所傳說故謂之傳所以異於先王之  
書也据此記亦名論語爲傳殆本於此然唐宋以來如呂  
黎集燕喜亭記引傳曰知者樂水仁者樂山新唐書魏徵  
傳引傳曰君使臣以禮臣事君以忠劉貢父公是先生集  
序傳曰不知言無以知人也亦沿是稱因跋此并及之

彰德府安陽縣寶山靈泉寺覆金峯新建石塔記

存正壽無年代在白藥山頂

寶山靈泉寺在彰德府西南五十里古相州地也寺之西南

一里山名曰其石巖巖舊有碑塔在上隋帝相救大將盧通之所建也歷年久遠磚形脫落本寺住持照慶照著廣募緣請置度二里白露村朱祥申氏捐捨資財創建石塔一座三丈五尺□然一新今覆金峯重建石塔四圍東有硃砂仙影南望大河西有丈八古佛北有崆峒佛常共瞻仰□行善事敬其神孝其親忠君之道照慶徒法乘之功豈淺淺乎哉故書以爲記白藥山住持照貴道玉助緣

缺

案塔記四面有字皆溜浸損剥惟北面可識文云彰德府安陽縣當是金時刻石也金史地理志彰德府散下宋相州鄴郡彰德軍節度治安陽天會七年仍置彰德軍節度明昌三年仍爲府以軍爲名是記稱彰德府當明昌時或

在其後矣又稱塔爲大隋帝相救大將盧通之所建相救  
字殊不成文或書石人謬誤耳盧通者卽豆盧通也隋書  
有傳通字平東高祖爲丞相尉迥作逆遣其所著莒州刺  
史烏丸尼率衆來攻逆擊破之賜物八百段進位大將軍  
此稱大將卽舉其官也開皇初進爵南陳郡公尋徵入朝  
以本官典宿衛歲餘出拜定州刺史後轉相州刺史建塔  
當在其時蓋已值開皇中矣豆盧複氏而此題單題盧攷  
舊唐書豆盧欽望傳曾祖通隋相州刺史南陳郡公云高  
祖以寬曾祖裴魏太和中例稱單姓至是改寬爲盧氏然  
則豆盧得單稱盧非書文者遷易爲之也又稱置度二里  
白露村墟邑之存其名者尤可備徵如此故具書之

安陽縣金石錄卷第八

偃師武虛谷先生著

安陽縣知縣鐵嶺貴泰校梓

元

商王廟碑

存八分書無年代在縣治東南商王廟內

前中大夫刑王廟文學樂著撰

口山安堂

缺

茲地之所謂相者其來久矣在大河之北乃唐之冀方漢之魏郡也處恒衛兩間清漳派其北大行阻其西六峯秀而明萬金通而利東西延袤幾二百里其川衍其野沃其氣候平

其風物阜實爲地之名區勝壤也昔有殷十二葉河亶甲始都於此王之於殷也上則有太戊仲丁下則有祖乙祖辛祖丁盤庚其見稱於書者太戊以修德而殷朝消其異祖乙以巫賢而殷家奠其功盤庚以遷都而殷道復其舊是君之作豈特六七王在其間其賢可知也不然□質之□□□須□□□自成湯至於帝乙成王畏相在召誥則□茲殷多□哲王在文武厥後王茲□□□在多士則曰自成湯至於帝乙罔不明德恤穰又曰亦惟天丕建保又有殷殷王亦罔敢失帝罔不配天其澤在多方則曰乃惟成湯以至於帝乙罔不明德慎罰□□□故家之所傳積德累仁之事□皆與焉謂之賢君可知者蓋亦有據云當王之居相也大振其治不

過遵祖而已其懷民也必能寬信其行師也必本仁義其宗  
勸也必慎賞罰其見德也必克宅俊至於子四窮則必推湯  
之惠及禽獸則必廣湯之澤此雖無明□蓋觀其人而知其  
政矣惜乎書無所載蓋逸書一篇秦火之而不存雖有孔壁  
之書李家之文皆科斗字時人無能識者故王之流風善政  
湮沒無聞焉文之書者河賈甲居相作河賈甲數字而已以  
此遺跡迨元魏置州曰相蓋取諸此也雖歷年□遠其土人  
思□□□德重相臺之始祖即闔閭之東殿而像之爲一  
方之所崇奉□□□□□□□□有年矣及遭申戌  
兵厄□火大然萬廬灰燼惟此廟□□□□存其神物護  
持有以致然也尋臻甫定城邑荒□其後人煙浸復顧瞻王

祠益禮敬而香火之遂口口之而增修前樓其門旁峻廡垣旣  
值旣實有加於舊矣然素闕碑銘无文以識之一日同年張  
敏修忠傑口司倉口邦寧國安里人趙松壽之踵門而告曰  
商王之廟口口之祖也不可不記向以多故未遑口口今日  
敢請愚口謂口幽其口口可口口口口口神也人不忘本  
可興也口相人口義不當口口口口口口口口口口口口  
口口口口口

功大祀達口口口口口惟河亶殷口口口口口乃祖成  
湯上天其澤雨露汪洋世禩六百以道而長口口口口口  
口口口口其事昔書之口遭際焚口今也口口口我口人  
口口口口棟宇其像冠裳口口口口血食此方口口兵焚

□□□□□□□□□□其揚□□□□優游帝鄉□□□  
□□□□□□□□書□□文章□□景燦日月煌煌□□勤  
石□□□□

□□□□□□甲辰□□月二十四日

缺

中州金石攷樂著八分書只存其半

中州金石記樂著撰隸書在安陽碑爲商河曹甲遷於相  
而作也文不全其年號無攷著自題前中大夫荆王府文  
學書體亦似唐人故置於此黃叔璥以爲金時物金無此  
官制恐非也

康少山按中州金石記云著自題前中大夫荆王府文學  
書體亦似唐人黃叔璥以爲金時人金無此官號也今考

金史百官志親王府文學二人從七品掌贊導禮儀資廣  
學問又宣宗子傳正大元年進封守純爲荆王郡志選舉  
表載著於明昌中登第而中州集又載其詩安得謂爲唐  
人乎此碑之刻雖不著年月以著攷之則在明昌後矣案  
碑自鄴乘節錄久不見全文今據碑增補雖未盡還舊觀  
亦尙存其概碑首題前中大夫荆王府文學樂著撰次行  
題口安常口蓋爲書文者名氏中州金石攷以爲樂著八  
分書失之不審矣碑云文之書者河置甲居相作河置甲  
數字而已以此遺跡迨元魏置州曰相蓋取諸此也攷元  
和郡縣志後魏孝文帝於鄴立相州初孝文幸鄴訪立州  
名尚書崔光對曰昔河置甲居相聖皇天命所相宜曰相

州孝文公之謚取內黃東南故殷王河亶甲居相所築之

城爲名也

通典太平寰宇記並作道武置相州取河此卽

碑所據碑已失其年月惟後有甲辰口月二十四日字攷

金史荆王守純傳哀宗卽位正大元年正月進封荆王則  
梁著爲荆王府文學當值其時依紀年通攷推之哀宗亡  
後甲辰實蒙古太宗之十五年于時金亡久矣故題銜稱  
前中大夫荆王府文學蓋由於此宜列入元碑之首非金  
時立石也

老君觀鐘識

存正書中統四年八月在治西老君觀

案鐘識惟三方有字皆陰文第一方云皇帝萬歲文武千

秩次云彰德路功德王宣授轉運使常景授轉運副使李  
二人並氏而不名次云本府夫曰宮提點趙中統四年八  
月初一日造据元史地理志太宗四年立彰德總帥府領  
衛輝憲宗二年割出衛輝以彰德爲散府屬真定路未稔  
鐘識在中統四年何以猶稱爲路或由鑄造人仍以舊名  
名之也宣授轉運使常見中統五年創塑東嶽行宮二聖  
后記有宣授彰德府路轉運使常德同卽其人德同字仁  
卿轉運副使李見太德七載韓氏新堂世德碑稱奉直大  
夫前彰德路轉運副使李揆篆額者是也

長興禪寺鐘識

存正書中統四年八月在城內西北觀音堂

案鐘識陰文上鑄皇帝萬歲宰臣千秋八大字下爲八方  
文云彰德府在城十方長興禪寺首座僧覺布提點僧惠  
洪化緣僧淨口同化緣僧惠口住持傳法嗣祖沙門福會  
都功德王宣差達魯花赤扛右伯娘子也口匠人口口口  
中統四年八月初一日元史地理志元太宗四年立彰德  
總帥府領衛輝二州憲宗二年割出衛輝以彰德爲散府  
屬真定路此識當中統四年爲世宗建元之癸亥歲其時  
彰德爲散府故云彰德府也宣差達魯花赤不言府縣蓋  
承上府言之卽爲府達魯花赤百官志文散官由一品至  
五品爲宣授散府達魯花赤秩正四品當稱宣授而云宣  
差當是地方長官有此宣差之文也

叔聖東嶽行宮二聖后記

存正書中統五年七月立在治城南東嶽廟後殿壁上

神鉦胡祇通書

昔周豐有言曰墟墓之間未施哀於民而民哀社稷宗廟之中未施敬於民而民敬無它其處所使然殆可知已是廟也東嶽天齊仁聖帝之行宮固當尊其廟見聳其瞻視使人起敬起愛此則正殿雖存而墻宇半摧玉座雖有而階砌已壞惟餘聖帝一尊而已一日宣授彰德路都轉運使常公仁卿同夫人劉氏來謁是廟下車焚香再拜□□□□□□人劉氏慨然有興修之志乃相謂曰既有□□□□有聖后退而晉諸典記果有二后一曰淑明皇后一曰太皇后卽日命高

于待詔創添左右皇后二侍從六因而增修聖帝之像儼然  
人望而敬之又爲起建華臺補完牆宇加之承塵窗戶凡事  
一新是歲饑饉相仍百物踴貴其粧塑價直暨人功食用約  
費白金百有餘兩了無難色意者使相人歲時奉祀以爲祈  
禱之地可謂仁於用心亦賢矣夫梨莊老人劉景申于是乎  
作記

宣授彰德府路轉運使常德同夫人劉氏中統五年七月  
朔立石

案記石中微有斷文前列神鉦胡祇通書後列梨莊老人  
劉景申記祇通見元史其字紹開此云神鉦蓋別號也中  
統初張文謙宣撫大名辟員外郎明年入爲中書詳定官

碑立於中統五年祇通已有官階而置之不書雅量非常  
矣碑述轉運使常德同暨夫人劉氏塑像始末文無可紀  
書體頗道緊孝廉董化南親訪得之

三泉福勝禪院保禪師塔銘

存正書至元二十九年三月在三泉寺

承事郎國子博士高書訓撰并書

□□衡篆額

洹水西山之陽曰三泉劍脊諸峯左右映帶正與寶山相直  
中有梵宮名福勝第一代文侃實住持之師乃澤州晉城賀  
撥店傅氏子生有宿緣總角時羣兒聚戲輒作禮佛誦經狀  
觀輩血郎惡之自童真出家禮裕州寶泉山下妙覺寺住山

山師慧諸明徹飽習經論叢林敬服九齡受具足戒汴梁亡  
北渡河挂錫廣平之安樂寺始明禪理遂參松溪老繼叅雲  
門下洪濟老時洞林秀老在成安興化寺廼往參焉昏不合  
其契聞彰德天寧寺南堂顯和尚機鋒雷震徑往問道南堂  
曰來何自曰興化曰興然一句如何師大笑南堂又曰何所  
學得來師曰不從千聖得豈假萬機求針芥旣投心地開朗  
相隨至泂水太平寺遂得法會衆開堂拈香出世傳道日廣  
相州三泉舊爲名利然未知何代所建兵燼來鞠爲墟矣惟  
前殿後堂欹傾踈罅於荆榛瓦礫之中幾爲頽圯寺監慶乃  
請師主澧曰經月營會不三數歲向之催敗者煥然一新齋  
廊庖帑之所咸法而備於是朝鐘暮鼓講席駢闐恒不下三

十餘輩師談演妙道諄諄無倦故四方來者樂從之遊無何開州崇福寺智監聞師之風具疏敦請旣至荒疏寂寥無以供衆養欲爲置恒產力弗能勝忽一老人持白金二百緡來施亦不通姓字師喜受不辭曰吾願足矣遂買田五百畝人謂陰相然無何師退席復歸三泉將終身焉晨起鳩門徒告曰死生常理吾自知之昨夢神人召我入火宮吾其亡乎援筆書頌而化故末後有請我三泉入火宮之句實申統建元八月八日也壽五十有八夏臘三十餘載茶毗之際牙齒不灰舍利尤異襲祖弟子了和以至元廿八年三月廿五日建塔於南平岡之首且來乞文紀師之行爲作銘曰

隻履西歸分流五派叢林滋蕃遍十方界千百餘年家風宛

在臨濟一支於今爲最出哉此確出來捏怪吹毛利劍批風  
近快持靜深山雷音漸大隨緣鼓笛自家爐鞴做箇道場有  
何妨礙擺手便行擲下皮袋勘破真空更出真外白塔巍巍  
羣山映帶陵谷變遷靈骨無壞

大元二十九年三月十有五日住持林舉了和了葵了然法  
孫普周普圓等立石

安陽李讓李前鐫

案碑前題承事郎國子博士高書訓撰并書書訓見河朔  
訪古記韓魏公國朝重建廟碑一通晉州判官高書訓撰  
高公太原人官至國子博士故尚書高鳴雄飛子也此碑  
題有國子博士正與納新所記合

長興寺小鐘識

存正書至元三十年十月在治西北觀音堂供几上

案鐘識陰文云臨安府富陽縣長受卹第四保龍掛西杜  
君住男口人妻口十口口五方口一个彰德府長興寺報  
父母恩至元三十年十月十五日元史地理志杭州路宋  
高宗南渡都之爲臨安府至元十三年平江南立兩浙都  
督府又改爲安撫司十五年改爲杭州路總管府二十一  
年自揚州遷江淮行省來治於杭改曰江浙行省蓋世祖  
立國屢易其名不聞號臨安府疑旣立行省後杭州復仍  
舊名史不悉錄猶幸見於鐘識得補其闕也富陽作富楊  
鑄作之訛

天慶宮香鐘識

存主書至元三十一年五月在東月城

案鑪識彰德路天慶宮香爐安陽縣口冶北鎮冶牛珪焦景賢積善李積德顏悚謹鑄至元三十一年五月十五日付興造鑪既存置

闕帝廟蓋元天慶宮遺址卽在此矣治上空字當爲銅字

老君觀寶鑪識

存正書至元三十一年八月在老君觀

案鑪識云中順大夫彰德路總管府達魯花赤兼本路諸軍奧魯總管府達魯花赤兼管內勸農事也里不花等伏爲天色亢旱苗稼焦枯低就本府西關上清正一宮祈雨累次感應口施寶鑪以伸答謝時甲午至元仲秋吉日行

從純靜抱一口真人交吏口口匠人付政元史百官志諸路總管府至元初置二十年定十萬戶之上者爲上路十萬戶之下者爲下路當衝要者雖不及十萬戶亦爲上路上路秩正三品達魯花赤一員總管一員並正三品兼管勸農事江北則兼諸軍奧魯攷彰德路爲下而設官與上路同蓋以地居衝要也此云兼諸軍奧魯亦江北之制如是並與史同結銜稱彰德路是彰德旣廢爲府於時又陞爲路地理志至元二年復立彰德總管府領懷孟衛輝四州四年又割出懷孟衛輝仍立總管以林慮升爲林州復立輔岩縣隸之是也最末書年以甲午冠至元之上是爲世祖三十一年七月成宗猶未改元故以歲名加於年號

上蓋變例也

秦城起宅記碑

存正書元貞二年四月在治西北觀音堂塔上

案碑石一尺餘陽面書天地日月國王父母八大字陰面有秦城起宅記後書元貞二年四月日昇淵刊魏齊間造像石多以師僧與君親並列此獨不踵其習碑旣云宅記宜寘之宅中未稔何時轉移塔上殆土人便附於此賴以不致殘毀亦一幸也

韓魏王新廟碑

存正書大德二年十一月立在城東南魏公祠

應奉翰林文字承務郎同知制誥兼國史院編修官高書

訓撰并書篆

賢王疆理西域食邑於相迺命大臣宴只吉台氏系開吉刺  
賁族也其子懷達襲爵懷達沒嘉議襲之嘉議讓其叔太中  
而陞侍御史太中公蒞職數年政平訟簡風俗恬熙吏習廉  
畏民樂生活禮文之事多所興舉一日詢諸耆宿曰韓忠獻  
以司徒判相三榮其鄉澤被斯民固已厚矣嘗聞聰明正直  
死當爲神能護一方故聖王之制法施於民以勞定國能禦  
大灾能捍大患者載在典秩咸得廟祀報本之情於斯可  
口世申之矣靈輿慶王以中正至大之氣惠及荒服功施社  
稷儼如日星昭昭然不可掩四者皆備宜爲神享祀將廟貌  
尸祝可乎僉曰可遂以已俸先僚佐忻然贊助□□□獻

方斤陶鍛塲各進其技摩城與陬之祠堂毀於兵燹今仍故  
基建廟設像焉曾不踰期歸然整肅凡聖帝明王忠臣烈士  
廟而祀之明詔也王之忠烈正合祀典固不待題勉而爲尙  
恐報之之未稱且古守令苟有遺愛猶立生祠頌德政或親  
而事蓋感之深思之至矧兩朝顧命元臣聰明正直而一者  
哉茲魏王廟所由作也世之人皆以死生禍福警動者敬畏  
雖殫財竭力奔走俯伏不厭蓋欲徼福免禍爲帝王何嘗以  
死生禍福警動人而大中公欽慕如此者何政有以效其夷  
險之節又將勵天下後代爲臣子者忠與孝也推公之口實  
淺淺即朝廷方重世臣它日復屈鈞軸垂紳正笏臨大簡決  
大議置大器於安寧地與主之事業相伴庶不負尙友之志

已戊戌冬廟告成太中公命走紀始末愧赧無容再拜辭曰  
歐陽司馬二公之說藝端明之字光燄萬丈照映千古太山  
北斗企仰誰及必復撰述當求名筆走口人庸贅語雖然  
謹歲月敢不惟命是聽或者難曰稱王非禮也出於徽手安  
取瀛是大不然徽雖失政王何與乎追封公論也徽亦何與  
焉王之勲業兒童皂隸其孰弗知初論儻異同必未免青蠅  
之汙旣公且正是以書之於策世莫得而議寧可以徽宗少  
貶歟至於諷慈壽選政叱允弼下殿先賀朋黨禍起皆斥逐  
獨得安然此又諸名公不及達甚烏虜王去世二百餘年名  
愈彰功愈光民愈不能忘太中公自懷遠凡四世幾六十載  
誠信於民民被其澤不爲寡矣後之致報當如何雖十世

也豈易量哉其財幣之數工役之計細務也不重云姑筆興  
建之原仍作歌以脩祀王韓琦字稚圭相州人上世葬安陽  
之西俗呼爲上下墳其辭曰

望太行兮蒼蒼渺渾水兮茫茫鬱元氣兮久秘藏維降神兮  
生忠良羌與一代兮爲禎祥輔兩朝兮日月光三衣錦兮榮  
故鄉脩騎鯨兮歸帝旁藏衣冠兮恒之陽澤流後世兮奚能  
忘繫太中兮民之綱建廟祠堂故基兮設儀像乎中央俾王  
功業兮闡然而口章芝室兮椒房桂爲梁槐兮菌爲棟梁菱  
荷衣兮芙蓉裳蘭有秀兮菊有芳壘之格兮風露涼月皎潔  
兮雲飄揚牙纛肅兮旗旌張鑼鼓咽咽兮鸞鳳翔覽九州兮  
遊八荒擁侍從兮皇皇搖環珮兮鏘鏘屈新廟兮歆我觴

丹兮焦黃薦肥脂兮羞馨香佑我邦家兮庇護一方雨暘時  
若兮豐年穰穰願公子孫兮世世其昌

提控案牘任昭 將仕佐郎知事王宗閔 從仕郎經歷  
馮傑

承德郎彰德路總管府判官兼管本路諸軍與魯李鑑

奉議大夫同知彰德路總管府事兼管本路諸軍與魯祖

福

少中大夫彰德路總管兼管本路諸軍與魯總管管內勸

農事張祐

太中大夫彰德路總管府達魯花赤兼管本路諸軍與魯

總管府達魯花赤兼管內勸農事也里不花

元大德二年十一月二十六日立石監造官錄判張文

府吏馮敏 縣吏張從簡

安陽李讓張珪

案碑前題銜應奉翰林文字承務郎同知制誥兼國史院  
編修官高書訓撰并書篆書訓高文忠之子鄴乘引舊志  
文忠子易訓書訓詩訓皆知名今見於碑者此其一也文  
去賢王疆理西域食邑於相廼命大臣宴只吉台氏係關  
吉刺貴族也其子懷達襲爵懷達沒嘉議襲之嘉議讓其  
叔太中公而陞侍御史太中公蒞職數年卽彰德路總管  
府達魯花赤也里不花也不花元史無傳故其先襲爵亦  
不可攷至所謂賢王食邑於相者竟莫知爲何王矣記言  
魏公追封王出於徽手宋史本傳致和五年追論定策功

加封魏郡王是也後列提控案牘任昭將仕佐郎知事王宗閔從仕郎經歷馮保承德郎彰德路總管府判官兼管本路諸軍與魯李鑑奉議大夫同知彰德路總管府事兼管本路諸軍與魯祖福少中大夫彰德路總管兼管本路諸軍與魯總管管內勸農事張祐總管府官及其屬略見於此惟提控案牘元史百官志諸路總管府其屬不見此員至散府設提控案牘一員然大德二年碑尙稱路則又非散府矣

韓魏王新廟碑陰

存正書

彰德路各州司縣官吏耆老人等

施石柱少中大夫順德路總管兼本路諸軍與魯總管兼管  
內勸農事郭儀

施禮府吏完顏從益謝輔田伯排張秉恭張英張易李居簡  
開爵馮亮鄭襄周彬鄭惟英徐敬郭邦彥府典吏孫士宏魯  
致遠

林州達魯花赤訥海州判謝瑞吏目蓋信司吏賈謙張遜張  
起史益蕭璧王從周

安陽縣縣尹朱祐縣丞郭惠吉縣尉李榮典史李允中司吏  
鄭時中夏誠德孫思恭趙明德魏思忠

湯陰縣達魯花赤鎖驢縣尹邵惟禎主簿朱口文縣尉關閻  
女典史任珪司吏牛近仁邢毅張忠政陳元用宋讓

臨漳縣達魯花赤拜不花縣尹張元亨縣尉王義伯典史夏郁司吏孫厚朱祥何松張克敏李友諒

錄事司錄事王世舉錄判張文紀典史任楫司吏張瑞程翼馬相祖王孝祖

站赤所提領口祐亢均李進

崇盈倉大使忙哥撒兒副使劉源

安陽銅冶焦社長郭衮焦德楊榮杜茂孫濟李口趙口王張謙宋社長鮑仲王通艾口薛時舉張楫韓璧南王村社長趙德韓進

施市極朝官村提領張口張昭石井徐安東流寺李義李順高村申仲通北蘇度吳興王和蓋村柴福將村黃用朱興宋

柑朱聚李祐劉寬麻水村耿明賈山趙彥張福賈景山東賈  
店張口高平村馬聚馮義賈貴賈珍賈山趙德程進張珪張  
元張林張進劉德馮侗宋資李德楊元鄭信鄭林孫平村口  
苑德張慶劉成張社長劉義王宜劉彈壓劉成劉順于聚郝  
玉邵村許潤謝聚王用王亨宋喜許成張起程祥

助緣施禮安陽縣達魯花赤字蘭奚錄事司達魯花赤黃頭  
府典吏馬良府典吏梁琛

修廟人匠木匠都作頭范謙泥匠都作頭劉傑塑匠都作頭  
王德明王璧粧畫都作頭王璋畫匠都作頭吳敏安陽縣木  
匠都作頭李用

天慶官提點劉志林下院口口女冠口王守真門弟看廟侯

守堅

錄事司儒學教諭董業書

案碑列林州達魯花赤及安陽湯陰臨漳各官吏元史地理志至元四年割出懷孟衛輝仍立總管以林慮升爲林州今碑所書林州是也然碑題彰德路各司州縣官吏耆老人等又附順德路總管郭儀一人當因其施石柱義不可沒故爲書之碑又載站赤所提領崇盈倉大使錄事司儒學教諭元史兵志站赤者驛傳之譯名也其官有提領與此同惟百官志不見崇盈倉名據鄭乘載崇盈倉在府治東北是明亦因元舊制設倉此當城內所置卽志所謂總管府有倉大使一員是也若志載河倉一十有七淇門

倉下卽載伏恩又諸綱內亦有安陽是伏恩倉屬安陽今  
城東南伏恩村距衛河僅三里伏恩倉以村爲名而府縣  
志失錄殆亦疎矣碑後載銅冶艾口南王村朝官村石井  
東流寺高村北蘇度蓋村將村麻水村東賈店高平村孫  
平村邵村諸名今並同

案碑載林州自達魯花赤納海州判謝端吏目蓋信口三  
人湯陰自建魯花赤鎖驢縣尹邵惟禎王簿朱口文縣尉  
閻閻女典史任珪凡五人臨漳自建魯花赤拜不花縣尹  
張元亨縣尉王藏伯典史夏郁凡四人皆方志所未及收  
故予存金石刻以備職官之表非獨安陽一縣拾其遺也